

KHUTBAH JUMAAT

“TUNTUTAN Mencari Rezeki Yang Berkah” (18 Oktober 2019M/ 19 Safar 1441H)

الْحَمْدُ لِلَّهِ الَّذِي بَعَثَ خَيْرَ نَبِيِّ أُرْسِلَ لِلْأَنَامِ، وَأَنْزَلَ مَعَهُ الْكِتَابَ
تَبَيَّنًا لِكُلِّ شَيْءٍ وَبُرْهَانًا لِلْأَوْهَامِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا
شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ.

اللَّهُمَّ صَلِّ وَسَلِّمْ عَلَى سَيِّدِ الْمُرْسَلِينَ، حَبِيبِنَا الْكَرِيمِ، وَرَسُولِنَا
الْعَظِيمِ، سَيِّدِنَا مُحَمَّدٍ وَعَلَى آلِهِ وَصَحْبِهِ أَجْمَعِينَ.
أَمَّا بَعْدُ، فَيَا أَيُّهَا الْمُسْلِمُونَ، أُوصِيكُمْ وَنَفْسِي بِتَقْوَى اللَّهِ عَزَّ وَجَلَّ،
فَقَدْ فَازَ الْمُتَّقُونَ.

قَالَ اللَّهُ تَعَالَى فِي كِتَابِهِ الْعَزِيزِ :

﴿ إِنَّ اللَّهَ يَأْمُرُكُمْ أَنْ تُؤَدُّوا الْأَمَانَاتِ إِلَى أَهْلِهَا وَإِذَا حَكَمْتُمْ بَيْنَ النَّاسِ أَنْ
تَحْكُمُوا بِالْعَدْلِ إِنَّ اللَّهَ نِعِمَّا يَعِظُكُمْ بِهِ ۚ إِنَّ اللَّهَ كَانَ سَمِيعًا بَصِيرًا ﴾

Kaum muslimin yang dirahmati Allah,

Marilah kita bersama-sama mempertingkatkan ketaqwaan kepada Allah *subhanahu wata'ala* dengan bersungguh-sungguh melaksanakan segala suruhan-Nya dan meninggalkan segala larangan-Nya. Mudah-mudahan kita menikmati kesejahteraan dan keberkatan hidup serta berbahagia di dunia dan di akhirat. Pada

hari ini khatib akan membicarakan khutbah yang bertajuk **"Tuntutan Mencari Rezeki Yang Berkat"** .

Kaum muslimin yang dirahmati Allah,

Rezeki memberi makna yang cukup luas dan ia bukan semata-mata benda yang boleh diukur nilainya seperti wang, gaji, pendapatan, makanan, harta dan seumpamanya. Menurut pandangan Sheikh Mutawalli al-Sya'rawi *rahimahullah*, seorang ulama tafsir yang ulung dari Mesir, rezeki ialah "Apa sahaja yang kita dapat rasakan manfaatnya, sama ada halal atau haram, sama ada baik atau buruk".

Ini bermakna, rezeki adalah segala apa yang dikurniakan oleh Allah *subhanahu wata'ala* yang bermanfaat, baik dalam bentuk fizikal seperti gaji, pendapatan, keuntungan perniagaan, rumah, kenderaan, anak pinak dan sebagainya. Atau pun dalam bentuk rohani seperti kesihatan, kecerdikan, ketenangan, kejayaan, kebahagiaan dan seumpamanya.

Konsep rezeki tidak terbatas sekadar pendapatan atau gaji semata-mata tetapi merangkumi keseluruhan pemberian Allah *subhanahu wata'ala*. Pendapatan boleh diperoleh mengikut kemampuan usaha manusia tetapi rezeki diberikan mengikut keluasan dan ketentuan Allah *subhanahu wata'ala* sepertimana firman-Nya dalam surah Saba', ayat 36:

قُلْ إِنَّ رَبِّي يَبْسُطُ الرِّزْقَ لِمَن يَشَاءُ وَيَقْدِرُ وَلَكِنَّ أَكْثَرَ النَّاسِ لَا يَعْلَمُونَ ﴿٣٦﴾

Maksudnya : *Katakanlah (wahai Muhammad): "Sesungguhnya Tuhanku memewahkan rezeki bagi sesiapa yang dikehendaki-Nya, dan Dia juga yang menyempitkan (bagi sesiapa yang dikehendaki-Nya); akan tetapi kebanyakan manusia tidak mengetahui (hakikat itu).*

Rezeki yang berkat pula bermaksud kurniaan Allah *subhanahu wata'ala* dalam bentuk sesuatu yang baik dan diperoleh dengan cara yang baik. Manakala rezeki yang tidak berkat adalah kurniaan yang tidak baik, tidak pernah cukup walaupun banyak dan diperoleh dengan cara yang tidak baik. Firman Allah *subhanahu wata'ala* dalam surah al-Baqarah ayat 172:

يَا أَيُّهَا الَّذِينَ ءَامَنُوا كُلُوا مِن طَيِّبَاتِ مَا رَزَقْنَاكُمْ وَاشْكُرُوا لِلَّهِ إِن كُنتُمْ
إِيَّاهُ تَعْبُدُونَ

Maksudnya : *Wahai orang yang beriman! Makanlah dari benda-benda yang baik (yang halal) yang telah Kami berikan kepada kamu, dan bersyukurlah kepada Allah, jika betul kamu hanya beribadat kepada-Nya.*

Oleh yang demikian, kita diperintahkan supaya bukan setakat memakan rezeki yang halal tetapi juga rezeki yang baik harus menjadi keutamaan. Contohnya, sesuatu makanan yang halal belum tentu baik jika ia menjejaskan kesihatan kita sekiranya diambil dalam jumlah yang banyak, seperti gula, garam dan makanan berlemak.

Selain itu, mencari rezeki juga memerlukan tujuan yang baik, bukan tujuan untuk mencari kekayaan semata-mata dan menjadi takbur dengan kekayaan itu, ataupun mencari rezeki bertujuan melakukan jenayah, maksiat dan sebagainya. Malah dalam konteks berkat, ia membawa maksud rezeki bertambah secara tersirat, umpamanya merasa cukup dengan pendapatan yang sederhana biarpun jumlah anak ramai. Itulah antara tanda keberkatan rezeki.

Kaum muslimin yang dirahmati Allah,

Keberkatan rezeki lahir hasil daripada keyakinan, ketaatan, kepatuhan dan kehambaan manusia yang berterusan kepada Allah *subhanahu wata'ala*. Justeru, walau pekerjaan yang kecil sekalipun, kita tetap perlu untuk menjaga keberkatannya. Kita mesti meletakkan keutamaan dan iltizam di dalam hati iaitu mencari rezeki bukan untuk mendapat kesenangan hidup semata-mata tetapi untuk mendapatkan rezeki yang halal dan berkat.

Atas tuntutan itulah para ulama menggariskan antara adab-adab mencari rezeki yang berkat ialah menetapkan niat untuk bekerja kerana Allah *subhanahu wata'ala*. Apabila seseorang mukmin telah membetulkan niatnya, maka dirinya akan melakukan pekerjaan yang halal, jujur dan ikhlas tanpa mempertikaikan jumlah rezeki yang diperoleh.

Kita juga wajib meyakini bahawa setiap manusia dalam dunia ini mempunyai bentuk rezeki yang berbeza-beza. Ada yang mendapat rezeki dalam bentuk material seperti kenaikan pangkat atau jumlah pendapatan yang banyak. Terdapat juga mereka yang gajinya tidak

besar tetapi memperoleh rezeki dalam bentuk ketenangan hati, kesihatan yang baik, keluarga yang harmoni, anak-anak yang pintar dan sebagainya. Justeru, niat bekerja sebagai satu ibadah yang dilakukan kerana Allah *subhanahu wata'ala* akan membetulkan hati manusia untuk melihat rezeki yang diperoleh itu adalah kurniaan Allah *subhanahu wata'ala* semata-mata dan ianya bukan daripada manusia.

Gaya hidup dan perubahan iklim ekonomi dunia sedikit sebanyak memaksa kita meningkatkan sumber pendapatan. Ada juga yang salah anggap bahawa rezeki hanya dalam bentuk wang dan harta bagi menjamin kesenangan dan kebahagiaan hidup, atas desakan hidup, manusia berlumba-lumba mencari wang dan harta sehingga kadangkala melangkaui batasan halal dan haram yang ditetapkan oleh syarak. Sanggup bersekongkol dengan penipuan, rasuah mahupun penganiayaan semata-mata untuk memperoleh keuntungan wang ringgit dan habuan duniawi.

Namun, harus diingat, bahawa kekayaan tidak menjamin kebahagiaan hakiki setiap insan. Realitinya kita sendiri melihat betapa ramai orang kaya tetapi tidak dapat menikmati ketenangan dan kebahagiaan. Harus juga diingat, rezeki melimpah ruah tidak sama konsepnya dengan rezeki yang halal dan berkat. Ada orang mempunyai harta yang banyak tetapi sayangnya tidak terdapat unsur keberkatan di dalamnya. Akibatnya hati tidak tenang dan makin jauh daripada Allah *subhanahu wata'ala*, keluarga tidak harmoni, tidak pernah merasa cukup dan berbagai lagi.

Marilah kita meneliti sepotong hadis riwayat Imam Muslim *rahimahullah*, daripada Abu Hurairah *radhiallahu anhu*, yang bermaksud :

((Nabi menyebutkan kisah seorang lelaki yang jauh perjalanannya (untuk beribadat), rambutnya kusut masai dan wajahnya berdebu. Lelaki itu mengangkat tangan ke langit dan menyeru: Wahai Tuhanku, wahai Tuhanku dengan bersungguh-sungguh. Sedangkan sumber makanannya daripada yang haram, minumannya daripada yang haram, pakaiannya daripada yang haram, diberi makan daripada yang haram. Maka bagaimanakah Allah akan makbulkan doa lelaki tersebut?))

Oleh itu, perkara utama dalam mencari rezeki bukannya berapa banyak yang kita peroleh tetapi sebaliknya bagaimana kita manfaatkannya bagi merebut keberkatan di dalam rezeki itu. Islam menggalakkan kita mencari limpahan rezeki dan kekayaan harta dunia, namun perlu mengikut saluran yang betul dan bijaksana dalam menguruskan harta supaya ia halal dan berkat demi mencapai kebahagiaan hakiki, sama ada semasa hidup di dunia mahupun di akhirat.

Kaum muslimin yang dirahmati Allah,

Mengakhiri khutbah pada minggu ini, marilah kita bermuhasabah dengan mengutamakan keberkatan dalam mencari rezeki, kerana setiap rezeki yang berkat akan melahirkan insan yang bertakwa dan memperoleh keredhaan Allah. Antara intipati khutbah yang boleh kita ambil pedoman dan pengajaran ialah:

Pertama : Mencari rezeki yang halal merupakan satu kewajiban bagi umat Islam atas dirinya dan ahli keluarganya.

Kedua : Perkara utama dalam pencarian rezeki bukan diukur melalui limpahan hasilnya tetapi melalui keberkatannya.

Ketiga : Masyarakat yang beretika tidak akan bersekongkol dengan penglibatan rasuah, penipuan mahupun penganiayaan semata-mata untuk mendapat habuan duniawi.

Marilah kita bersama-sama menghayati firman Allah *subhanahu wata'ala* di dalam surah al-A'raf, ayat 96 :

أَعُوذُ بِاللَّهِ مِنَ الشَّيْطَانِ الرَّجِيمِ.

وَلَوْ أَنَّ أَهْلَ الْقُرَىٰ ءَامَنُوا وَاتَّقَوْا لَفَتَحْنَا عَلَيْهِم بَرَكَاتٍ مِّنَ السَّمَاءِ وَالْأَرْضِ

وَلَٰكِن كَذَّبُوا فَأَخَذْنَاهُم بِمَا كَانُوا يَكْسِبُونَ ﴿٩٦﴾

Maksudnya : *Dan (Tuhan berfirman lagi): Sekiranya penduduk negeri itu, beriman serta bertaqwa, tentulah Kami akan membuka kepada mereka (pintu pengurniaan) yang melimpah-limpah berkatnya, dari langit dan bumi. tetapi mereka mendustakan (rasul kami), lalu Kami timpakan mereka dengan azab seksa disebabkan apa yang mereka telah usahakan.*

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ
الْعَلِيمُ، أَقُولُ قَوْلِي هَذَا، وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ
الْغَفُورُ الرَّحِيمُ.

الْحَمْدُ لِلَّهِ. الْحَمْدُ لِلَّهِ حَمْدًا كَثِيرًا كَمَا أَمَرَ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ لَعَلَّكُمْ تُفْلِحُونَ. قَالَ اللَّهُ تَعَالَى:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ، كَمَا صَلَّيْتَ عَلَى سَيِّدِنَا إِبْرَاهِيمَ وَعَلَى آلِ سَيِّدِنَا إِبْرَاهِيمَ، وَبَارِكْ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ، كَمَا بَارَكْتَ عَلَى سَيِّدِنَا إِبْرَاهِيمَ وَعَلَى آلِ سَيِّدِنَا إِبْرَاهِيمَ، فِي الْعَالَمِينَ، إِنَّكَ حَمِيدٌ مَجِيدٌ. وَارْضَ اللَّهُمَّ عَنِ الْخُلَفَاءِ الرَّاشِدِينَ الْمَهْدِيِّينَ، سَادَاتِنَا أَبِي بَكْرٍ وَعُمَرُ وَعُثْمَانُ وَعَلِيٌّ، وَعَنِ الصَّحَابَةِ وَالتَّابِعِينَ لَهُمْ بِإِحْسَانٍ إِلَى يَوْمِ الدِّينِ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ. إِنَّكَ سَمِيعٌ قَرِيبٌ مُجِيبُ الدَّعَوَاتِ وَيَا قَاضِيَ الْحَاجَاتِ.

Ya Allah, ampunilah dosa-dosa dan kesalahan kami, ibubapa kami, ahli keluarga dan guru-guru kami. Limpahkanlah kesejahteraan, kedamaian dan kebahagiaan kepada kami semua dalam kehidupan di dunia ini, lebih-lebih lagi di akhirat kelak.

Ya Allah ! Ya Rahman ! Ya Rahim! Berikanlah taufiq dan hidayat-Mu kepada kami semua dan juga kepada pemimpin-pemimpin Negara kami, khasnya kepada *Seri Paduka Baginda Yang di-Pertuan Agong Malaysia*, dan juga pemimpin-pemimpin negeri kami, khususnya *Tuan Yang Terutama Yang di-Pertua Negeri Sarawak*. Ya Allah, kami bersyukur ke hadrat-Mu yang telah

mengurniakan kami rahmat dan nikmat, sehingga kami dapat meneruskan usaha ke arah memperkukuhkan negara kami, khususnya Negeri Sarawak yang tercinta ini, sebagai sebuah negeri yang maju dan sejahtera.

Justeru, kami pohon ke hadrat-Mu ya Allah, buat kami semua dan generasi muda dalam kalangan remaja dan belia kami ini, kukuhkanlah iman kami, tingkatkanlah amal ibadah kami, suburkanlah peribadi kami dengan budi pekerti dan akhlak yang mulia, eratkanlah perpaduan kami, murahkanlah rezeki kami, kayakanlah kami dengan ilmu pengetahuan, kemahiran dan keterampilan yang bermanfaat, bimbinglah kami ke jalan yang Engkau redhai, hindarkanlah kami daripada terlibat dalam apa jua unsur negatif yang boleh menjatuhkan maruah diri, keluarga, masyarakat, negara dan ummah.

اللَّهُمَّ اجْعَلْهَا سُقْيَا رَحْمَةٍ، وَلَا تَجْعَلْهَا سُقْيَا عَذَابٍ، وَلَا مَحْقٍ وَلَا
بَلَاءٍ، وَلَا هَذْمٍ وَلَا غَرْقٍ. اللَّهُمَّ عَلَى الْآكَامِ وَالظَّرَابِ، وَمَنَابِتِ
الشَّجَرِ وَبُطُونِ الْأُودِيَةِ.

اللَّهُمَّ اسْقِنَا غَيْثًا مُّغِيثًا مَرِيئًا هَنِئًا مَرِيئًا غَدَقًا مُّجَلَّلًا عَامًّا طَبَقًا سَحًّا
دَائِمًا. اللَّهُمَّ اسْقِنَا الْغَيْثَ وَلَا تَجْعَلْنَا مِنَ الْقَانِطِينَ.

اللَّهُمَّ رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

Ya Allah, angkatkanlah daripada kami segala kesulitan, keadaan berjerebu, cuaca yang amat panas dan ketandusan air. Turunkanlah kepada kami air hujan yang memudahkan, menyuburkan, menyeluruh, dan berterusan manfaatnya. Kami berlindung dengan-Mu daripada diuji dengan banjir besar, kemarau panjang, wabak penyakit, persengketaan, kemiskinan dan kebuluran. Kami bermohon denganMu Ya Allah, semoga negeri kami akan sentiasa bertambah aman, makmur dan berkat.

رَبَّنَا أُنِثْنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. أَمِينَ،
أَمِينَ يَا رَبَّ الْعَالَمِينَ.

عِبَادَ اللَّهِ. إِنَّ اللَّهَ يَأْمُرُ بِالْعَدْلِ وَالْإِحْسَانِ. وَإِيتَاءِ ذِي الْقُرْبَىٰ وَيَنْهَىٰ
عَنِ الْفَحْشَاءِ وَالْمُنْكَرِ وَالْبَغْيِ. يَعِظُكُمْ لَعَلَّكُمْ تَذَكَّرُونَ. فَادْكُرُوا اللَّهَ
الْعَظِيمَ يَذْكُرْكُمْ. وَاشْكُرُوهُ عَلَىٰ نِعَمِهِ يَزِدْكُمْ. وَاسْأَلُوهُ مِنْ فَضْلِهِ
يُعْطِكُمْ. وَلَذِكْرُ اللَّهِ أَكْبَرُ. وَاللَّهُ يَعْلَمُ مَا تَصْنَعُونَ. أَقِيمُوا الصَّلَاةَ.